

# Lebih banyak insentif jaya transformasi tani

## Negara mesti terus dapatkan teknologi, ilmu: TPM

Oleh Syuhada Choo Abdullah  
choo@bharian.com.my

**K**UALA LUMPUR: Kerajaan akan memperkenalkan lebih banyak inisiatif dan insentif untuk pembangunan ilmu pengetahuan dan teknologi baru untuk meningkatkan pengeluaran hasil pertanian negara.

Ia termasuk peruntukan khas dan geran penyelidikan dan pembangunan (R&D) bagi menyokong inisiatif itu, kata Timbalan Perdana Menteri, Tan Sri Muhyiddin Yassin.

Katanya, peruntukkan itu juga akan digunakan untuk membangunkan teknologi lepas tuai bagi meningkatkan pengeluaran hasil pertanian negara.

"Inovasi adalah kunci kepada program transformasi pertanian negara bagi menjadikan sektor itu lebih kompetitif. Malaysia mesti terus berusaha mendapatkan teknologi baru dan ilmu pengetahuan yang dapat mempercepatkan program ini secara berkesan," katanya berucap merasmikan Simposium Lepas Tuai Antarabangsa Ke-7 (IPS 2012) di Pusat Dagangan Dunia Putra (PWTC) di sini, semalam.

Hadir sama Menteri Pertanian



Muhyiddin Yassin

dan Industri Asas Tani, Datuk Seri Noh Omar; Pengerusi Suruhanjaya Kualiti dan Lepas Tuai Hortikultur, Pertubuhan Sains Hortikultur Antarabangsa (ISHS), Dr Sirichai Kanyanarat.

Malaysia tuan rumah pertama di Asia untuk penganjuran simposium antarabangsa itu yang diadakan setiap empat tahun. Seramai 532 peserta dari 46 negara menghadiri simposium lima hari itu.

Simposium anjuran bersama Institut Penyelidikan dan Kemajuan

Pertanian Malaysia (MARDI), Universiti Putra Malaysia (UPM) dan ISHS bertemakan 'Lepas Tuai Untuk Kesihatan dan Kekayaan' bertujuan berkongsi dan membincangkan teknologi lepas tuai terkini bagi mengatasi isu kekurangan makanan sejagat.

Muhyiddin berkata, buah-buahan, sayur-sayuran dan bunga segar mudah rosak perlu ditangani dengan betul untuk mengurangkan ketirisan sepanjang rantaian pembekalan dari peringkat penapaian sehingga penggunaan.

Katanya, ketirisan lepas tuai bagi tanaman itu dianggar 30 hingga 40 peratus di negara membangun, kira-kira dua atau tiga kali lebih tinggi berbanding negara maju.

"Ketika ini, negara membangun menghasilkan 1.05 bilion tan sayur-sayuran dan buah-buahan segar yang meliputi 78 peratus pengeluaran hortikultur dunia, dan jika ketirisan dapat dikurangkan 10 peratus, ia akan menambah bekalan sebanyak 105 juta tan dalam pasaran global," katanya.

Justeru, beliau berkata, cabaran kini adalah meneruskan usaha mencari langkah kos efektif untuk mengurangkan pembaziran dan ketirisan itu.